

氏族典第三百七卷

商姓部彙考

鄭樵通志 以國爲氏 古帝王氏

商氏子姓商本上雒今之商州也及成湯有天下始遷於亳而命以殷然商之號亦未始廢焉商始祖契其母曰簡狄爲帝嚳次妃三人行浴見元鳥墮卵取而吞之孕而生契舜命契爲司徒封爲商十四世至湯放桀又三十世至紂周武王滅之子孫以國爲氏魯有商瞿仲尼弟子又秦有衛鞅本衛公子也封爲商君子孫亦以商氏焉宋朝登科有商庭又有商言詩登州人

同名異實

商氏有二成湯之後爲商衛鞅封商君其後亦爲商

廖用賢尙友錄 商姓

商宮音汝南又望出濮陽

商姓部列傳

商 商容

按史記商本紀商容賢者百姓愛之紂廢之及武王伐紂表商容之閭

周 商子

按尚書大傳伯禽康叔見周公三見而三笞商子曰南山之陽有木名橋北山之陰有木名梓二子盍往觀焉二子往觀見橋木高而仰梓木晉而俯反以告商子商子曰橋者父道也梓者子道也二子再見周公入門而趨登堂而跪周公拂其首勞而食之

商瞿

按史記仲尼弟子列傳商瞿魯人字子木少孔子二十九歲孔子傳易於瞿瞿傳楚人馯臂子弘弘傳江東人矯子庸疵疵傳燕人周子家豎豎傳淳于人光子乘羽羽傳齊人田子莊何何傳東武人王子中同傳菑川人楊何

商澤

按尚友錄澤字子秀魯人孔子弟子涉覽六籍唐封睢陽伯宋真宗加封爲鄒平侯

漢 商苞

按東觀餘論漢太尉劉文饒碑二故吏李謙等立一門生商苞等立一

商鳳

按萬姓統譜鳳見印墩

宋 商夷簡

接萬姓統譜夷簡雍熙中泉州知州

商宗彌

按元史商挺傳挺六世祖宗彌宋仁宗時爲太子中舍人年五十掛冠

商瑗

按萬姓統譜瑗其先汴人流寓西夏仕都知兵馬使嘉祐六年因奉使歸宋奏獻密事上嘉其義賜地於浙之淳安以居卽今遼源之芝山也子孫因家焉以蔭補官者三世

商份

按福州府志份福清人登紹興庚辰梁克家榜

商侑

按福州府志侑福清人字元佐份之弟登隆興癸未太待問榜

商俊

按福州府志俊份之弟淳熙間特奏名

商侑

按福州府志侑字元節份之弟登淳熙丁未王容榜

商飛卿

按宋史商飛卿傳飛卿字翬仲台州臨海人淳熙初由太學登進士第仕無爲軍教授累官至工部郎官時韓侂胄柄國氣焰薰灼飛卿既至未嘗輒一造請踰月卽丐去提舉福建路常平茶鹽事擢監察御史以言事迂侂胄罷爲奉常請外以祕閣修撰爲荆湖南路轉運判官後改司農卿總領江東淮西軍馬錢糧開禧中就擢戶部侍郎侂胄舉師有旨俾飛卿軍前傳宣撫勞值金兵大至幾不

免以憂卒

商言詩

按萬姓統譜言詩登州人登科

商衡

按金史商衡傳衡字平叔曹州人至寧元年特恩第一人授鄆州洛郊主簿以廉能換鄆縣尋辟威戎令興定三年歲饑衡白行省開倉賑貸全活者甚衆秩滿再辟原武令未幾入爲尙書省令史轉戶部主事拜監察御史爲右司都事改同知河平軍節度使未赴改樞密院經歷官遙領昌武軍同知節度使事丞相完顏賽不領陝西行省奏衡爲左右司員外郎正大八年以母喪還京師十月起復爲秦藍總帥府經歷官天興元年二月關西行省徒單兀典等敗於鐵嶺衡爲兵士所得欲降之不爲屈監至長水縣東岳祠前誘之使招洛陽衡終不肯降望闕瞻拜遂引佩刀自刎

元 商挺

按元史商挺傳挺字孟卿曹州濟陰人其先本姓殷氏避宋韓改爲挺年二十四汴京破北走依冠

氏趙天錫嚴忠濟辟挺爲經歷出爲曹州判官未幾復爲經歷世祖在潛邸聞挺名遣使徵至入對稱旨字而不名楊惟中宣撫關中挺爲郎中明年惟中罷廉希憲來代陞挺爲宣撫副使世祖卽位以挺宣撫陝蜀中統元年改宣撫司爲行中書省進挺爲僉行省事二年進叅知政事四年行四川樞密院事至元元年拜叅知政事二年分省河東俄召還六年同僉樞密院事七年遷僉書八年陞副使九年封皇子忙阿剌爲安西王以挺爲王相王薨王妃使挺請命於朝以子阿難答嗣帝曰年少祖宗之訓未習卿姑行王相府事初運使郭琮郎中郭叔雲與王相趙炳構隙或告炳不法妃命囚之六盤獄以死朝廷疑擅殺之執琮叔雲鞫問伏辜初無一毫及挺惟王府女奚徹徹以預二郭謀臨刑望以求生始有曖昧語連挺帝怒召挺拘炳家十六年始釋二十年復樞密副使俄以疾免二十年趙氏子復訟父冤挺又被繫百餘日乃釋二十五年卒延祐初諡文定子五人璚璘璠璣琦

商夢弼

按萬姓統譜夢弼至元中原武縣尹蒞政勤敏案無凝滯決獄明信人無敢輕犯

商璚

按元史商挺傳挺子璉字台符至元十四年以姚樞許衡薦拜江南行御史臺監察御史二十七年徵拜中臺監察御史三十年遷國子司業卒

商璉

按元史商挺傳挺子璉字禮符仕爲右衛屯田千戶歲餘謝病侍親

商琦

按元史商挺傳挺子琦字德符大德八年成宗召備宿衛仁宗在東宮奏授集賢直學士調大名路治中不赴皇慶元年授集賢侍講學士延祐四年陞侍讀官通奉大夫泰定元年遷祕書卿病歸卒璉善畫山水嘗使蜀持平守法秋毫無私

明
商嵩

按定陶縣志嵩定陶人洪武三年任監察御史上疏直言時政彈劾權貴無所回互

商顯雅

按黃梅縣志顯雅好詩書永樂二年徵聘至朝固辭不任賜號樂耕徵士奉詔歸

商閭生

按龍溪縣志閭生宣德時歲貢官成都府教授

商輅

按明外史商輅傳輅字弘載淳安人鄉試會試殿試皆第一除修撰輅丰姿瓌偉英宗親簡爲展書官廊王監國以陳循高穀薦命入內閣參機務徐瑄倡南遷議輅力沮之其冬進侍講景泰元年遣迎上皇於居庸進學士三年進兵部左侍郎景帝不豫石亨輩迎復上皇王文于謙等被收召輅命草復位詔亨密語輅赦文不須別具條款輅曰舊制也不敢易亨輩不悅諷言官劾輅朋奸下之獄斥爲民然帝每念輅以忌者竟不復用成化三年驛召至京復以故官入閣尋進兵部尙書久之進戶部宋元通鑑綱目成改兼文淵閣大學士皇太子立加太子少保進吏部尙書十三年進謹身殿大學士輅爲人平粹簡重寬厚有容至臨大事決大議毅然莫能奪中官汪直之督西廠也數興大獄輅條直十一罪遂罷西廠然直雖不視廠事寵幸如故譖輅嘗納指揮楊勝賄欲脫其罪輅不自安而御史戴縉復頌直功請復西廠輅遂力求去詔加少保賜勅馳傳歸居十年卒諡文毅

商良臣

按萬姓統譜良臣字懋衡文毅公輅之子也登成化二年進士第授翰林庶吉士累官至翰林侍講卒於官良臣天資淳厚學問老成文章器識無愧於父衆皆惜其早世不克究其用云

商汝弼

按萬姓統譜汝弼淳安人弘治舉人

商潤

按龍溪縣志潤弘治十一年歲貢任海豐訓導

商璣

按夏津縣志正德辛未秋劉寇陷高唐時璣往高唐訪友遇寇見其驍勇迫使從曰從我得死璣罵之曰祖名宦兒輩庠生寧從汝爲盜耶賊怒殺之有司具其事以聞旌之

商臣學

按萬姓統譜臣學淳安人正德舉人

古今圖書集成
商汝頤

按萬姓統譜汝頤會稽人正德中湖廣叅議

商賓

按萬姓統譜賓洛陽人以吏科給事中改知銅陵疏請聽民開墾荒田民無不業者任滿民請留進府同知仍知縣事

商大節

按明外史商大節傳大節字孟堅鍾祥人嘉靖初進士授豐城知縣擢兵科給事中京察竣復命科道互相劾被謫鹽城縣丞三遷刑部郎中出爲廣東僉事累官山東按察使擢右僉都御史巡撫保定四年召理院事奄荅大舉薄都城詔城中居民及四方入應武舉者悉登陴守以大節率五城御史統之北寇退復命經略京城內外訓練鼓舞軍容甚壯擢右副都御史經略如故仇鸞爲大將軍盡統中外兵馬大節獨爲一軍不受其節制欲困之乃請畫地分守以京城四郊委大節大節言雖經略京城實非有重兵專戰守責鸞又頻調遣奸宄猝發誰爲捍禦哉所爭甚晰而帝方寵鸞不欲

人撓其事責大節懷奸避難立下詔獄時三十年四月也竟卒于獄隆慶初復故官諡端愍

商誥

按平原縣志誥嘉靖丙辰進士任肥鄉知縣陞兵部職方司主事守山海關北兵攻遼東薄關下時海冰正堅誥預遣人鑿之北兵趨海口至則冰泮難渡遂掠鄉民奔赴入關者如蟻誥大開關門以納之敵弗敢入繼而攻水關甚急城上軍士單弱不能敵誥出城中壯士助之指授方略敵弗敢攻乃退去事聞欽賜銀兩陞蘇州兵備

商祖堯

按文登縣志祖堯與宋奎常材潘鑄劉鑾武忠宋應期潘繁張子玉許富皆靖海武彥也嘉靖三十一年倭衆犯衛祖堯等率衆捍禦奮不顧身倭遂潛退事聞各蒙欽賞銀段而宋奎馬馳幾遇害賴子應期奮救功尤卓焉

商經

按陽信縣志經字貫道嘉靖年貢士任中都留守司斷事才幹優長操守廉潔御墨褒之

商賚

按陽信縣志賚字子均歲進士經孫萬曆丙子經魁授獲嘉縣令勸開墾撫流移除羨金蠲逋賦嚴局賭驅流娼息訟免贖一塵不染旣而歲祲設法拯救積勞成病竟卒于官

商文昭

按漳浦縣志文昭萬曆乙未進士官終南安知府

商大儒

按武城縣志大儒字載樸南之子明朝恩選爲人剛介潔清甘貧樂道戊寅年城陷與兄醇儒子文企俱仗節而死

商宗禮

按陽信縣志宗禮母有噎疾日夜憂之忽夢神告以方乃割左肋肉炙熟用麪丸藥以進母食輒愈

商際昌

按陽信縣志際昌父璉販絲爲富民盜入其室被執際昌裸身持刀一躍而出急呼其從兄曰起救

吾父兄曰衣際昌曰衣父命休矣裸身持刀疾呼而入賊衆披靡殺死一人傷數人力孤勢窮竟爲所斃賊去鄉人以無子弔其父其父曰吾有子吾有子際昌妻某氏年二十餘歲守貞不渝

商疊

按黃梅縣志疊母疾不粒食疊亦屏粒忍飢且割股療之不效及母卒號泣不已願從母地下私往橫岡山捨身于萬仞之崖氣雖絕猶岸然而立也拾骸者奇之

昌姓部彙考

鄭樵通志 以名爲氏 古人名

昌氏風俗通云黃帝子昌意之後今嶺南多昌族望出汝南東海

凌迪知萬姓統譜 昌姓

昌汝南商音

昌姓部列傳

上古 昌寓

按姓氏急就篇黃帝臣昌寓驂乘

周昌他

按戰國策昌他亡西周之東周盡輸西周之情於東周東周大喜西周大怒

魏昌豨

按魏志臧霸傳霸與于禁討昌豨與夏侯淵討黃巾餘賊有功遷徐州刺史

梁昌義之

按梁書韋叡傳天監五年魏中山王元英寇北徐州圍刺史昌義之於鍾離高祖遣曹景宗拒之詔叡率豫州之衆會焉魏軍大潰叡遣報昌義之義之且悲且喜不暇答語但叫曰更生更生義之甚德叡請曹景宗與叡會因設錢二十萬官賂之

唐昌琦

按萬姓統譜琦禮部郎

宋昌永

按萬姓統譜永字禹功涇人靖康中金人犯京師永率太學諸生守義不屈朝廷嘉其節補進義校尉紹興癸未以特奏第一累遷太常寺丞

昌懿

按萬姓統譜懿邕州人進士補文學紹興中上疏言馬政

昌稽中

按萬姓統譜稽中朝奉郎知建州

昌森

按萬姓統譜森字元秀涇人初授蘄州廣濟縣尉以捕盜改秩知光州固始縣秩滿任揚州僉判歷知英連二州

昌湜

按萬姓統譜湜大理寺丞

昌正大

按萬姓統譜正大嘉定進士

元 昌中峰

按萬姓統譜中峰池州儒學教諭

明 昌俊

按萬姓統譜俊涇人洪武貢生

昌祚

按蘄州志祚永樂年貢士松江府華亭縣知縣

昌盛

按萬姓統譜盛威遠人永樂舉人

昌安

按潛江縣志安宣德丙午舉人官訓導

昌文